

Amiel Gibbs, participante den Formacion Social:

"Mi a haya un chens y Formacion Social lo yudami den esey"



ORANJESTAD(AAN): Participante y mayornan ta hopi contento cu Prome Minister Mike Eman y su Gobierno a bini cu e iniciativa di Formacion Social. Un programa cu ta duna un man na hobennan cu a desvia un poco den nan rumbo di bida.

E programa ta worde ehecuta cu cooperacion di Marinierskazerne. Amil Gibbs ta un hoben masha agradecido, specialmente pasobra esaki ta di dos biaha cu e ta drenta Formacion Social. E prome biaha e no a logra pero na e ocasion aki e ta bay p.e. "Mi kier a haci'e pa mi mama. Den mi 24 aña mi no a logra nada, pesey mi a pone cu mi finalisa e programa di Formacion Social, pa mi mama especialmente."

Diabierna ultimo un parti importante a yega su fin pa e hobennan cu a cuminsa cu e programa di Formacion Social dia 12 di januari ultimo. Durante tres siman nan a keda interna den Marinierskazerne, sin contacto cu famia y amigonan. Nan a pasa dos fin di siman den mondi, bibando den forma primitivo. Na final di e tres simanan aki, a keda cu 15 hoben cu a demonstra disciplina y un forsa di boluntad grandi pa finalisa e programa Formacion Social.

Na momento di a haya permiso pa bay cas, Amil Gibbs tabatin un brasa kibra, pero apesar di esaki el a keda. "E tabata hopi duro. Mi a hasta kibra un brasa, pero mi no ta entrega. E biaha aki si mi ta cab'e. Mi tin un meta y mi ta bay logr'e. Mi kier haci mi famia orguyoso." El a conta cu den su prome participacion den e programa el a comete un error grandi di

bandona na momento cu nan tabata den e parti di training, algo cu e ta lamenta awe. "E programa aki ta bale la pena, apesar cu e ta duro. E unico cos cu tabata pasa den mi mente tabata mi mama y mi yiunan. Mi kier haci nan orguyoso di mi, pasobra mi tin 24 aña y nunca mi a haci'e feliz. Esaki ta mi chens y mi kier logre," Gibbs, hopi emocionada brasando su mama, a duna di conoce. Su mama, Gladys, ta masha agradecido na Dios y e gobernantenan pa iniciativa di e programa aki cu ta duna hobennan e oportunidad rehace nan bida. "Hopi di e muchanan aki pa circunstancianan di bida a scoge e caminda robes, pero Formacion Social ta motiva y guia nan, pa nan ta contento y util pa famia y sociedad. Mi ta gradici tur esnan cu ta haci e programa aki posibel y Dios bendicionanan pa nan sigui traha pa hobennan di Aruba. E proyecto ta uno cu por yuda nan." E yiu chikito di Gibbs (6 aña) tambe tabata presente. Un di e hobennan cu ta participa den e programa, Derrick John, a drenta e programa dia 12 di januari y na momento cu e tabata pasando su prome dianan den Kazerne, el a haya e noticia cu su yiu a nace, esta dia 14 di januari. El a worde permiti pa mira su yiu, pero esaki tabata algun rato so. Diabierna ora cu e por a bay cas, su señora tabata sper'e cu e baby recien naci. Esaki ta un estimulo pa e caba e programa, tabata comentario di su famia. Bunita tabata e mainta pa mira con famia ta apoyando e hobennan aki den e decision tuma pa participa den e programa di Formacion Social.